

摘藻堂四庫全書薈要

集部

欽定四庫全書薈要卷一萬六千六百三十六

集部

懷麓堂集卷七

明 李東陽 撰

詩稿七

七言古詩

平陰武愍王輓詩

十有四年秋八月胡笳吹塵暗城闕漢家天子親出師
旌旗如山令不發將軍意氣如飛熊腰間寶劍雙白虹

長戈一麾四十萬六合慘澹多悲風胡天冥冥夜飛雪
將軍奮呼山石裂平生鐵石舊肝腸化作烏鳶口中血
君王龍馭今在途臣身已死誰為扶中興功業吾豈敢
君王獨歸臣不返裕陵松柏自千年臣歸祔葵橋山邊
英魂或助天飈起長為狼山掃夕烟

送金太守致仕

北風蕭蕭起平陸遠客還思舊鄉曲青袍白馬送君歸
楚水吳山為誰綠當年獻策來京華飄飄意氣凌雲霞

曉日長趨九華殿春風爛醉五侯家
雙旌照人日杲杲承恩獨出長安道
西江稚子解絃歌南國騷人怨芳草
退身不待衰病年懸珂結駟空留連
三山松柏宛然在五陵桃花亦可憐
山中寥寥何所有萼菜羹蕪菊花酒
相如膝上七絃琴元亮宅邊五株柳
清時令子居黃門門前冠蓋如雲屯
功名去住總適意此樂悠悠安可論

赤壁圖歌

荊州水軍八十萬鼓擢揚旗下江漢
江東將帥誰敢當

年少周瑜獨輕難漢家英雄本龍種怒指中原扼雙腕
孔明決策討操逆誓復深仇起相扞東風吹沙暗赤壁
百里旌旗眼中亂列炬爭馳疾若星南軍已在中流半
黃郎大呼老瞞走烏鵲翻飛過江岸攀援失手勢兩孤
一紙軍書萬人散賊兵未平壯士死猜疑已作蕭牆患
唇亡齒寒不自知可惜衣冠盡塗炭乾坤無情歲月改
千古茲山石不爛東坡老翁好竒古一官遠向黃州窟
簫聲入秋木葉空此地經過獨腸斷高歌扣舷和者誰

回首斯人亦凋換
姦雄僭竊何足數
青史離離後人看
為君擊節歌此圖
卻立蒼茫倚長歎

庚寅夏苦雨荅鳴治長句

驚雷破樹雲出山
急雨墮地流潺湲
爾來一月未斷絕
行路危塞往復還
官隍朝決朝陽闕
野渚夜漲張家灣
邊河人家數千口
骨肉漂蕩隨枯管
居人乘舟走平陸
船底秫苗俯可攀
城中溝渠失䟽導
街頭結筏通市闌
東鄰嫠婦抱兒泣
西家老翁窮且鰥
升求斗糴典衣盡

有物何況珥與鐸君王惻惻念孤瘵賑粟屢自公家頒
故老相傳乃舊典先朝以來幸未刪翰林腐生詩骨孱
城南敝屋堵不環劇遭委頓怕泥滓十日不造承明班
因思春夏久枯旱後何冗濫前何慳甲兵未見洗幽朔
流移直恐窮荆蠻五曹謝公有深慮向來憂國鬢欲斑
揮毫作歌意慷慨直欲廣廈千萬間朝廷有道弭災沴
胡不浩蕩開愁顏

沈刑部所藏墨竹歌

沈郎之貌古不妍滿懷清思如湧泉手中墨竹風娟娟
坐我一片瀟湘天貪愁吟鬢灑霜雪已覺紗帽隨風偏
人道湘靈解鼓瑟此中似有泠泠絃自言得此意蕭索
中夜不敢高堂眠問誰作者夏太常平生翰墨江海傳
雪堂無人老可死此物價重黃金錢近來畫竹有數家
世人皆愛我不憐我非能畫却能看別有苦思通幽玄
病眼揮毫不成字小者如粟大者拳西鄰奚老髮半白
東鄰陸郎美少年清歌苦調兩不厭為子和我滄浪篇

周少卿雙壽堂

周郎豪宕老不狂近來好事爾擅場全家舊住西湖口
甲第新開雙闕旁高車駟馬通晝夜墨客騷人爭短長
阿翁堂東母西坐面如紅玉頭比霜十日催詩八九至
一盃獻壽百千強御璽重封五花誥大官屢出九霞觴
紗帽輕籠夏陰薄翠羽將動秋風涼短簫大鼓聲動地
吳曲越吟歌繞梁浮雲欲度不肯度落日半落還低昂
曲廊烟霧散復合舞袖風花抑更揚花底番番喚綠酒

燈前隊隊出紅妝金波玉繩耿不定樓箭宮壺殊未央
共說神仙隔風雨豈知塵世無滄桑西池王母誰曾見
南極老人空壽昌眼前相對且為樂世事悠悠安可量

歌風臺送李舍人

芒碭龍氣去復來長風萬里黃雲開手提三尺視六合
酒酣獨上歌風臺大風之歌何壯哉樽前灑淚數行下
當時聽者鬪悲哀沛中小兒解擊鼓不見干戈見歌舞
三戶丘墟已滅秦兩生制作空逃魯君王自信材且武

衣冠士人棄如土大風之歌竟何補李侯自是江東儒
壯年挾策事明主平生慷慨心好古亦欲南遊弔徐楚
是時朝多賢俊臣坐令四海無兵塵禮樂成俗忠孝敦
君亦還家懷老親君歸試問荆與榛豈無儒碩遭沉淪
丈夫勳業共努力君今豈是江湖人

題陳考功所藏山水圖

我昔南遊向南國輕舟浩蕩隨所適雨纜朝辭楚岸沙
風帆遠挂吳山色毘陵城東好山水平湖方田渺蕭瑟

錫山惠峯俱在眼
舟人野夫相與識
谷口浮雲乍有無
林間細路仍荆棘
錫山李侯邀我遊
此興豈待相促迫
是時江湖足風雨
城郭半化為溝洫
苔深石滑苦不支
屐倒筇顛正愁劇
匆匆揮手謝使去
還家仰天空歎息
向來經過信偶爾
岳麓險絕西湖僻
寧知咫尺不相遭
恐是山靈闕題籍
潦倒誰開摩詰圖
依稀尚有元龍宅
元龍舊是湖海豪
作官十年歸未得
揮毫賦詩本無意
況我與子同夙昔
炎天倦眼藉披豁
從事索詩如傳駟

却恐詩成卷送還高堂素壁空相憶

深宮美人圖

秦宮丘墟漢宮圯望仙銅雀參差起隋唐去後花綺空
流落誰家畫圖裏桂殿椒堂十里香繡襦寶帶鬪成妝
前庭歌聲後庭舞鳳輦不來深夜長玉甌犀筯涼風發
團扇空悲舊時月不見千門萬戶時祇今何處埋香骨
馬家大練長作裙沉香錦襪隨風塵君看掩鼻工讒者
何似辭恩下輦人

畫松為顧良弼主事題

畫松不必真似松，風骨畧與畫馬同。畢宏曹霸兩奇絕，
妙意正在阿堵中。君家素壁光如雪，上有虬枝老垂鐵。
晚歲長同怪石寒，炎天恥受高雲熱。江翻樹轉爭喧豕，
十步九戰何時開。陰房半扃山鬼嘯，海水不斷天風來。
城南野人頗醇古，坐受涼秋滿虛宇。安得移來十丈青，
高價如山棄如土。知君此興迥莫攀，謂予苦絆風塵間。
攜琴載鶴招使去，我家自有徂徠山。

送武昌徐翁南歸

翁行人鑄
之父也

黃鶴磯頭秋草色，高樓四面青山碧。
我來君去兩浮萍，忽漫相逢更南北。
君家舊在江城居，白頭紗帽隨巾車。
作客聊同薊門雁，還家應憶武昌魚。
蘭橈桂櫂日將晚，斗酒放歌情未踈。
杜甫不堪垂老別，嵇康曾著絕交書。
徐卿有子吾所羨，騎馬題詩曲江宴。
賦終奏入明光宮，詔成捧下麒麟殿。
青雲於我最交親，況復山川是舊鄰。
送君此去情無限，綠樹猿啼湘水春。

林良雙鵲圖為通政程公作

華堂繡幕雙雕攏樹間靈鵲穿玲瓏當春解識芳菲意
鎮日相呼樓閣風疎枝密葉開復歇曲檻叢臺西忽東
共愛羽毛爭洗濯由來律呂自諧同此時閉戶填青葱
昨日天書下紫宮已喜西州金印大何如南海畫圖工
開筵置酒賓燕喜愛畫索詩公意濃却愧當年賦鸚鵡
氣酣捉筆如飛鴻

江風圖為劉太僕二丈題

寒空木落江呼洶，疊浪如山亂堆壟。雲拖雨腳隨長流，
萬里蛟龍作人踊。獨有一葉之扁舟，舵側帆歌未肯休。
潁洲斷岸地旣航，遠樹絕島天沉浮。眼前萬象錯恍惚，
倉卒遇之寧暇求。由來適意在頃刻，此外豈復千金謀。
南人使船如使馬，夢落江湖若飄瓦。君看白首波濤中，
笑殺磯頭釣魚者。高堂慘淡開丹青，坐見四壁皆滄溟。
酒酣擊節歌不成，感慨忽與歡娛并。昔公江漢初揚舲，
亦如湘纍浮洞庭。一朝奮起在平地，健翮上可凌高冥。

謝安尚憶中流坐師德何妨逆浪行向來夷險竟何物
世間萬事如浮萍

題邵容城所藏畫松圖

種松谿邊長十丈高雲對屋團青障中有幽人愛讀書
苧袍紗帽秋蕭爽青苔白石坐移時衡門晏起獨開遲
山中繁實雨初落水面垂蘿風倒吹十年南北江湖夢
野樹孤雲遞迎送此地材同新甫良多君官比藍田重
酌君美酒聽我歌東園桃花能幾何丈夫功業在晚節

君今尚壯非蹉跎

張御史洪死土木之難其子浙江參議敷華請
為詩以輓之

平城敵騎紛騰薄大駕親征向沙漠漢家將軍令不專
四十萬人俱不還百官扈從爭赴死玉佩金章者誰子
道傍白骨無人收中有豸冠張御史張公直筆橫秋霜
平生鐵石為肝腸長軀七尺棄如屣赤日下照雙瞳光
山間野狐猶陸梁願為厲鬼隨君王君王入朝臣恥雪

驍帥戕軀強敵滅羣公坐享昇平年恨不生持子卿節
公今有子登金門九原再拜君王恩十年兵甲不復試
兩世箕裘今尚存相逢若問公家世莫話龍沙舊時事
仰天不獨悲賢豪一曲哀歌幾行淚

送沈仲威之南京兵部兼憶乃兄仲律僉憲東
計刑部汝和吳屯田元玉

昔年我在金陵城捨舟躍馬長安行大江為隍石為郭
天地設險通神靈闕庭巍巍擁臺署館舍濟濟羅賢英

朱樓畫棟連飛甍六街三市分縱橫琳宮寶地不知數
復有金碧摩崢嶸雞鳴山頭海色動雨花臺前芳草平
是時同遊盡豪俊元方最有能詩名賦詩載酒樂未已
長揖遂作西南征君今作官向南署予亦歸來幾寒暑
壯心廓落江海空目斷雙鴻欲飛去羨君生長在茲地
山水還經舊時路好事真成太史遊多才不恥班生賦
錦袍紗帽坐看書官清地切兵曹居中宵或有彭城夢
暇日自引河陽車我家北都官北闕未免塵滓隨簪裾

人生離合類萍梗因君感舊重鬱紆浮梁醉客久不見
青龍山人音問疎二君詞畫吾所愛憶我為寄江南圖
早朝遇雨道中即事

長安五月霖雨多六月更急如翻河通宵到晚不得寐
茅屋欲破愁嗟我攬衣當戶未能出却坐蓬窓聽疎密
縱道君恩屢放朝端居未敢忘巾櫛九衢燈火迷西東
輕蓑瘦馬隨疲童道傍行子顧且笑謂予亦在泥塗中
感渠相念不相識問之不荅還匆匆如聞身是營中卒

畚鍤欲赴朝天宮古來王事稱靡盬予亦勤勞竟何補
為渠慚愧久低回雨急巖城聽鳴鼓

荷鷺圖為薛御史作

秋山沓寥秋水濶一夜天風起蘋末萬籟凋餘錦樹空
繁花落盡紅衣脫鷓鴣鸕鶿俱無聲沙邊白鷺如有情
幽禽相呼落日暝尺鯉下避寒潭清寒潭直下幾千尺
落羽回波共蕭瑟獨立遙憐海嶼青低飛不礙江雲白
詩家畫格還相宜却憶江南初見時雍陶池上風雨集

摩詰田中烟火遲吾生頗似巢籠鳥十年塵土長安道
萬里滄浪一片秋安得閒身此中老

張養止檢討所藏王舜耕雪圖

朔風撼山山石裂老樹杈杈半枯折陰雲匝地凍不收
知是前溪夜來雪回峯遠岫相明滅斷梗流澌正幽咽
天寒萬籟聲蕭蕭水行無舟陸無轍村回徑仄隨歌傾
危橋欲墮猶低撐長空遙遙一雁下白屋裊裊孤烟生
灞陵豪客一時興東郭幽人千古情高堂對酒不得醉

我意豈獨憐丹青君不見去年三冬無一白又不見九月江南雪盈尺豐年消息定何如欲向田家問麩麥官曹坐食無良籌子亦胡為著組流知君故是經濟器慷慨莫忘蒼生憂

破戒後明仲勸作詩韻

自別詞林老冰玉

明仲號

塵滿胷中數千斛忽傳健檄督

我詩我詩未成君累幅苦君相操如濕束強將冠屨加老禪頓使如葷兼食肉平生此事性所好縱使戒心寧

戒目劉伶斲酒忍解醒虞七廢書猶畫腹羣公左袒纔

兩人後有修撰

鼎儀

前侍讀

舜啓

向來論議各反復老將深

機信神速始知詩酒非俗事詩亦可作酒可盃此語雖

佳恨不除

明仲詩有云飲酒作詩俱不俗

悔却從前三月俗即當載酒

攜我詩來聽高談如炙轂

亨父以梅花扇寄其門人索賦一首

江頭古樹花滿株蟠虬屈鐵相縈紆微雲點綴不盈掬
風格自與羣葩殊翰林老吏神仙骨揮毫兩袖清香發

空梁夜半酒醒時夢斷江南酒樓月仙郎瀟灑如宗之
平生愛畫復愛詩山高水濶望不見瓊林玉樹空參差
謝學士所藏山水圖歌

翰林門地清於冰高堂六月開雲汀涼風撼撼起庭宇
萬籟如在空中聽空山蒼蒼入林莽江上茅亭隔風雨
層窓曲檻深闌寥寂寂幽絃似相語繩牀棊几隨周旋
塵尾不動聲琅然山高水闊鳥飛盡惟有碧樹鳴寒蟬
東鄰老翁跨驢至西家屐齒半欲穿山頭荷擔步還却

此豈有意泠泠絃先生愛山復愛水看畫題詩宛相似
坐令賓主成三人不羨謫仙花月裏玉堂退食時相從
恍然坐我青芙蓉願將一曲洗雙耳更待高樓闔闔風
題朱儀中雪雨二圖

洛陽城中一丈雪洛陽先生被如鐵洛陽令尹呼始醒
足不可出骨可折誰為此圖圖者誰深山日晏起闔遲
呼童擁篲亦多事安用掃此門庭為前山無樵溪不釣
獨坐空林發長嘯鴟鴞飽肉鷗鷺飢歲暮苦寒空自知

世人厭寒爭附熱此景蕭蕭向誰說
炎涼翻覆如畫圖
圖中之人今有無

菰叢蒼蒼集烟渚山頭濕雲半為雨
垂蘿繞屋茅覆牆
石燕林鳩似相語
桃花落盡梅子黃
南湖北泖俱茫茫
黃泥道路白頭浪
知是江南烟水鄉
長安溽暑秋過半
雨濕書牀盡糜爛
三年詩逋坐盈案
拂君畫圖為君歎
閉門覓句無人催
呼童卷送休徘徊
君看白石最深處
紙背猶濕青莓苔

鰕魚圖為掌教謝先生作

泮池雨過新水長江南鰕魚大如掌沙邊細荇時吐吞
水底行雲遞來往其間種類多莫辨短者如鍼細如綫
三年養得鱗甲成萬里空嗟畫圖見一官薊北後巴西
丹青不改鬢成絲遙憐天路飛騰地長記春風長養時
宦途萍水紛無迹再見此圖三歎息遠行珍重寄雙魚
魚中定有長相憶

舜咨歸省尚書公餞者以韓昌黎送鄭校理詩

分韻予最後得廓字時呂中書秉之得洛黃鴻
臚蘊和得閤邵戶部文敬得薄濮武庫用昭得
泊俱同韻除互押外共得二十有六予詩後成
凡諸君所用者皆不敢襲其韻數亦不敢獨減
諸君獨廓字乃所分本韻雖已為戶部所押不
復避也

贈君高歌罷君酌君行正懽予作惡憶年十五前識君
我童始成君冠弱秋闈春榜俱少年愧有聲名比盧駱

石渠金馬高崔嵬壁彩奎光遞聯絡分班華蓋冠裾集
賜坐彤墀杯俎錯南宮閱卷春持衡秘府藏書夜收鑰
官雖異調偶同秩亦得隨君侍經幕朝遊暮燕無停時
十日不見心已愕與君出入若蛩蹶將往復還如有約
中間蹤跡頗乖隔君南歸吳我遊鄂同時豪俊八九人
幾見參商互升落君今復駕滄江颿岐路未免東西各
高門舊可容駟馬廣廈遷聞賀羣雀紅脂臘酒醅正開
白雪鱗魚膾新斫彩衣翩翩花婀娜酒酣戲舞欣欲躍

尚書老倦賓客勞起坐為君成矍鑠古人至樂在甘旨
一日豈換三公爵知君此興歸正濃棄我別離如敝屨
獨予踈蹇具百疾仰藉忠言比良藥壯夫恥作兒女顏
能不感慨傷今昨君才磊落經濟資應讓祖鞭先我著
宦途已作前輩行莫遣流光迅如燭遠行珍重勸加餐
幸有長軀能大嚼情深義重出肝腑此語雖粗未為謔
語闌呼酒重酌君百罰深杯勿辭虐長歌未終短篇續
臨發更煩開一喙詩成酒盡君已遙獨望江天渺空廓

題陳考功所藏何太守山水圖

春雲巍巍山欲活沙明水清石可掇飛泉墮空紛濺沫
長流赴耳聲湑湑畫手依稀入毫末妙思似恐詩人奪
君看茅堂向空闊卷幔青山在窓闥中有一翁頭戴襪
白髮蕭蕭短垂褐有魚旋烹醅旋醱誰與長年老蒿蒻
石橋雨過春泥澆山長水修去莫達溪邊小船輕比筏
舟人不來費呼喝我懷若人心欲渴有奴當驅馬當秣
慷慨不愛青袍脫高堂暫開神已豁坐對巉巖聳雙髻

吏人索詩方苦聒十日閒愁為君撥談笑頓解詩囊括
興如長風駕巨艤韻險橫被狂流遏紙短詩長重刪撮
潦倒却恨并刀割

邵文敬所藏畫松圖

老榦叢枝色深黑蛟龍戰空雷雨擊空堂素壁光虛白
望斷冰崖雪千尺君家此圖圖者誰誰其似者畢與韋
酒醒片石月欲墮坐久鳴濤風漸稀初如廬山尋白鶴
不聞人聲聞子落復如駐馬藍田廳樹下或有吟哦聲

主人能慕復能賦倉卒相逢不知處嗟予亦是好奇人
慣聽涼秋滿庭戶城南風景無塵埃東曹隱者心悠哉
閉門却掃戒僮僕莫效前呵喝道來

王祠祭希曾所藏汝和紅菊歌

世人作畫皆論派汝和畫菊乃天解直將書法寫此花
宛轉金枝總垂蕤初為水墨後紅紫幾向清纖發狂怪
桃羞杏澀寧比妍蟻恨蜂愁未堪嘬幽蘭堪供屈子佩
竒石當邀米公拜當時落筆亦偶然忽有聲名起砰湃

僮奴塞戶卷委山不獨文逋與詩債有時偃蹇不受促
怒目看人兩眦眦酒酣興發誰使顛迅掃但覺吳鱣隘
箇中三昧我獨知每見渠揮為渠快最是平生跌宕心
病卧窮山老何憊南宮王君得此圖舊索遺紅未凋敗
豈知一見已陳迹江水東流日西邁摩挲两眼三歎息
悔却從前比菅芥長安賈客君不聞已索黃金市中賣

彭學士先生所藏劉進畫魚二首

魚為水族類最稠近時畫手安成劉生綃如雲筆如雨

恍惚變態不可求大者獨立為豪首小者列從分奴騶
翻身吮沫日弄影一一如在空中遊風鬢霧鬣卷復散
頃刻巨浪高山丘上摩虛無拂倒景下逐遠勢歸長流
初疑聚石作九島咫尺之地皆汀洲又如然犀照牛渚
海若露叫羣靈愁問渠類象誰指示或者神授非人謀
畫圖貴似不必似却恐有意傷雕鏤擬將天地作畫筭
此語吾傳蘇子由江湖茫茫隔塵土吾欲遠掛珊瑚鈎
臨淵之美亦徒爾況乃物幻無停眸詩成日暮酒半醒

蕭蕭落木高堂秋

西園太液今靈沼山下碧波春渺渺紅鱗紫鬣時去來
雲影烟光足昏曉微塵不生空宇闊百丈秋毫差可了
沙邊細沫吹轉回水面青蘋拂還繞窈窕遙憐宿鷺閒
飛騰不羨輕鴻矯朝廷有道萬物遂池榭雖多幸遊少
帝澤還同雨露深餘生得謝晷辰擾慈宮宴罷移彩舟
學士詩成賜清醪羽林郎官亦供奉筆下丹青疾於鳥
白玉堂中一尺白片月孤雲未為皎天上真傳種類奇

人間豈合泥塗湫十二闌干九曲堤置身忽在垂楊杪
極知飛躍皆聖化摹寫無才愧荒渺他時變化那可期
已覺神光射天表

王世賞所藏林良雙鳳圖

鳳凰何來自丹山一舉千仞不可攀鳴聲入雲光耀日
倒影下墮蒼茫間梧桐作巢倚空碧俯首啄食青琅玕
遂令三百六十種風翎露翼空闌珊虞廷周甸信烜赫
魯門漢府皆虛謾九苞六象杳莫覩誰遣圖畫留人間

翰林王君好竒者家有丹青絕瀟灑巾藏篋裏二十年
云是林良舊時寫斯人畫格獨羽毛愛此天然非物假
由來象外有神助猶恨當時知者寡聖朝至治登虞唐
手持玉燭調陰陽賢人在位吉士出豈以異物充禎祥
王君矯矯人中鳳端合置之白玉堂起宗竒毛本異種
吾見先公居廟廊君當奮飛隘八極我已避路看翱翔
太平有象須黼黻不獨文字爭輝光

王世賞席上題林良鷹熊圖

坡陁連延出林麓孤鷹盤挈熊躡伏金眸耀日開蒼烟
健尾捎風起平陸由來異物乃同性意氣飛揚兩撐矗
山跑野掠紛路岐何事相逢輒相肉側睨翻疑批亢來
迅步直欲空壁逐乾坤蒼茫色慘淡落木蕭颼滿空谷
羣豺斂跡百鳥停萬里長空齊注目是誰畫者誠崛竒
筆勢似與渠爭速坐間賓客皆起避階下兒童駭將蹴
當筵看畫催索詩卷帙不待高閣東平生搏擊非我才
欲賦真愁成刻鵠微酣對此髮雙豎酒令詩籌復相督

頓令拙劣成粗豪一飲步兵三百斛

題黃宗器秋官所藏何太守山水圖

濕雲浮空山欲動亂壑回峯互吞湧當溪獨樹雨冥冥
青苔覆地春陰重深山白石幽人居鉤簾寂寂坐看書
竹橋入林野有藪草閣傍水門無車行人細路隔山脚
曳杖前登後還却浦口輕舟信往還鐘聲遠寺空寥廓
此中可釣亦可耕不然且濯滄浪纓酒酣夢覺兩相失
此身豈獨憐丹青風流太守何侯筆三十年來已蕭瑟


君今愛惜須久傳予亦題詩坐終日

題錢世恒所藏王孟端墨松卷次饒介之舊韻

松根成龍石作羝仙山稜層隔天梯層陰疊翠聳雲漢
下視百丈紅塵低左慈幻術有真偽葉公畫格空雄雌
九龍山翁不同調韋偃畢宏為等夷寒聲不斷殷幽壑
細影欲動搖晴漪恍若臨流聽清籟芒屨布袍隨所之
須臾晝暝神鬼泣虺蜴怒叫蛟鼉悲問翁胡為不畫竹
王子似厭參差吹人間拙匠枉學步此翁聲名難並馳

強揮筆管潑墨汁凡骨却笑神仙癡未論遺蹟為世寶
已覺紙價高當時殘縑片楮久不見二丈吳牋藏者誰
梁公老去陳氏滅此調豈有知音知手探靈脂掘石髓
江東錢翁元好竒胷中撐拄不平事海水側立虞山危
家藏沉復有聲畫臨川老饒清妙詞郎君少年今壯髮
風木忽動皋魚思平泉樹石米家舫往事逝矣何能追
篇成頗覺古意遠撫卷載誦徂徠詩

懷麓堂集卷七



總校官庶吉士臣張能照
校對官檢討臣盧應
騰錄監生臣閔思紀

欽定四庫全書薈要

集部

懷麓堂集卷八

九



欽定四庫全書蒼要卷一萬六千六百三十七

集部

懷麓堂集卷八

明 李東陽 撰

詩稿八

七言古詩

艾光祿所藏畫龍

墨池雨漲春水渾
翻綃潑練紛吐散
波濤瀕洞烟霧昏
中有靈氣吐復噀
化為鱗甲如山嶽
葛陂之子延平孫

焦臺雷澤皆弟昆昂頭奮角倨且蹲一嚇顛走百孟賁
怒昔倒射搏桑暎身闖震宮排艮闔蹴踏月窟蟠天根
東遊暘谷西掠崑憑丘躡閩山為髡霆車電熾喧作屯
朱芒閃地烈燄燉前驅鱗鱗後鯨鯤肯與鯨鮪同甕盆
頃刻變化茫無痕四海盡被沾濡恩是誰畫者稱專門
腕未操筆氣已吞登堂薦見駭欲奔以手熟試稍可捫
葉公老死空遊魂神物化去精靈存龍飛在上九五尊
公今為雲正細縕願隨沛澤彌乾坤彼丹與青安足論

題沈啓南所藏郭忠恕雪霽江行圖真蹟

洛陽老狂眼雙白
揮毫醉呼聲裂帛
手持造化奪天工
頃刻雲烟變朝夕
有時點染入毫忽
決昔未須論寸尺
平看側睨部位勻
疊見層分了無隔
更聞篆法書絕倫
二物殊科乃同格
前身合是顏平原
骨蜕空山兩無迹

世傳忠恕尸解
事與魯公正同

君看雪霽江行圖
杳若張帆向空碧
沙

明水淨天地
濶遠樹平川
晴歷歷兩舟
供載百物具
細者銖藏鉅
山積老稚相
宛有情傭工
僕夫皆受職
世

間畫手自有數此狂一去難再得宣和舊物出內局書
題瘦筋印方石風塵瀕洞河洛空流落江南歲三百天
球河圖廟不守微物猶關世因革富家珍襲何足論終
作貧兒一朝食姑蘇沈郎亦好竒袖裏黃金輕一擲定
知仙筆可通神恐有六丁隨霹靂桓玄竊取吾所笑一
月為君頻拂拭還君頗覺未忘情摹本為予君莫惜

朱中孚秋官竹園書屋歌

桂陽縣南多竹園朱家種竹秀且蕃根如蟠龍葉蒼鳳

上蔽倒景回清暎南池水清綠於染影帶晴江春冉冉
中林斷處忽青山門外筆峯秋數點竹園老翁長愛詩
讀書教子鬢成絲臺驂郡駕日相逐澗雨巖風無改時
栢臺老臣霜雪姿南歷嶺海西幽岐十年襟袍畫圖見
萬里平安書札知秋曹郎官清比竹身著青袍佩蒼玉
竹林在園書在屋如此傳家殊不俗君家未貧貧亦足
有園可居書可讀我家湖南子鄉曲無竹無居但空谷
歸當坐子青石林淨洗胷中塵萬斛

劉尚質南樓題王舜耕山水圖

溪聲潺湲雜林壑山勢蜿蜒去還卻浮雲欲起未起時
半在溪頭與山腳入空高鳥飛欲盡背屋斜陽慘將落
更無剩地與閒人縱有紅塵何處着南畝老翁雙鬢斑
筆法頗似高房山少年豪宕老疎放徃徃醉墨留人間
平生畫癖兼山癖一見此圖三歎息愧我不如樓上人
日日開窓看秋碧

林侍御孟仁所藏王舜耕山水圖

青山雨過行雲濕高者在田低在隰溪風飄搖正無力
巖壑忽開中壁立翠微依稀入空杳叢林崢嶸石戢戢
山根細路無人行空庭生苔土花濕江南江北定何處
擬欲從人問州邑載酒疑逢好事來泛舟恐有漁郎入
心知畫圖本虛幻頗為塵襟豁羈紲粉墨人間孰與留
乾坤此老何嗟及烏臺鐵冠高屹屹山亦可動水可激
坐將冰雪灑炎荒六月高堂風撼撼

題沈啓南所藏林和靖真蹟追和坡韻

湖亭路繞梅花曲石硯年年洗芳淥湖光照眼花絕塵
此老當時面如玉詩應獨步難同調字豈必工終不俗
城東蒼頭持卷來一夜起看三秉燭我從書法得相法
骨秀神清臞亦足有如辛苦學神仙火冷空山斷葷肉
遺編舊事已陳迹五百年來登鬼錄水流花落兩無情
誰能更和西湖曲石田詩人亦清士居不種梅翻種竹
他時併作隱君論何似周蓮與陶菊

題畫鷹送羅緝熙南歸

大鷹猙獰爪決石側目高堂睨秋碧小鷹偃伏俯且窺
威而不揚豈其雌雌雄起伏各異態意氣相看出塵壙
獨立羞將衆羽羣高飛怕有浮雲礙山寒木落天始風
日色慘淡川原空人間狐兔自有地慎勿反擊傷鷓鴣
畫圖彷彿是誰作宛似懸鞬臂間落高堂匹練長風生
萬里炎荒盡幽朔我生竒氣空嶙峋揮毫對此不無神
送渠羽翼朝天去亦是雲霄得意人

張侍御世用所藏山水圖歌

秋山日落川氣黃樹影下映寒潭蒼叢篁入林豁蒙翳
石角路轉山東岡蒂堂對山復面水高者可履深可航
閉門卻掃動經月落葉委地苔覆墻豈無山客跨款段
亦有孺子歌滄浪吾生早覺簪組累十年丘壑成膏肓
畫圖彷彿見此景褰裳欲渡川無梁空堂五月燠如火
使我鬱塞迴中腸安得盤陀一片石坐醒殘醉生餘涼
君今持節行萬里要遣霜雪清炎荒請看窮谷最深處
或有隱逸藏聲光揚清激濁付公等吾欲拂衣辭太倉

陸馬後東蕭文明給事長句并呈同游諸君子
我在黃門夜燕歸徑驅健馬疾若飛馬蹄翻空身墮地
豈獨塵土沾人衣徒行卻叩黃門宅主翁醉睡驚倒屣
東軒太床許借我筋骨屈強眠不得二郎擁臂下中庭
左曳右挈蹒跚行西鄰乞藥走僮僕東家貰酒來併罌
大郎慰問不停口以手熨抑重復輕黃門對床卧答語
獨夜沉沉何限情黃門朝回我起坐南屏潘郎跨驢過
西臺驄馬隨東曹復有同官兩寮佐周郎哭子涕未乾

聞疾赴予如拯墮羣嗟衆言增我憂獨喜南屏向子賀
憶當墮馬城東阿前有深渠後坡陀置身隙地不盈丈
或有鬼神相撓訶茲行未必不為福對酒盡醉且復歌
詩成臂病不能寫黃門健筆如操戈庭空客散日在戶
夜踏肩輿代徐步道逢東曹送我歸舉袂卻之猶返顧
入門強作歡笑聲實恐衰顏驚老父閉門穩卧病經月
幸是閒官寡書簿高吟朗諷猶舌存歌坐看書書屢誤
故人入坐時起迎拄杖徐行轉愁仆黃門父子時過問

愛我情多豈予助平生骨肉欣戚同世上悠悠幾行路
宦途夷險似有數墮馬為君今兩度作詩病起謝黃門
各保千金向遲暮

文敬墜馬用予韻見遺再和一首

我馬西行東客歸歸心落日爭分飛長安城中一掌地
顛倒鞭鞵隨裳衣君時別向中書宅兩日吾門斷雙履
寧知此厄忽相遭怪事驚從武昌得東曹舊儻尚書庭
當堦跛曳止復行曲身正自憑几杖伸臂強可持杯罌

拳如崔家獨足鷺風雨不動垂絲輕誰其賞此句獨苦
吾荷武昌無限情面當軒前花下坐病足蹠跚為花過
詩才與病應力爭酒興鄉心復相佐歸來病劇吟愈工
作勢猶疑馬前墮故將竒事發高懷衆口慰君君自賀
憶當散髮林中阿掃石自坐青盤陀肩行板輿步筇竹
左塵右筴隨麾訶風檣浪楫見亦慣倉卒不廢歎與歌
誰令冠屨執羈策頓覺平地生鋌戈安樂富中長閉戶
萬事茫然人推步如何物理異人情墮甌有時猶卻顧

羊家臂折登三公塞上髀傷歡老父定知時運迭乘除
或者神靈司籍簿南人漫作知章嘲北客善騎寧免誤
嗟予亦是長安人二十年來幾顛仆向來病臥苦岑寂
劇飲豪吟賴君助言酬德報理則然况是前車覆同路
世間墮者亦無數共說郎官好風度即看走馬向亨衢
莫待驅馳歲云暮

文敬攜疊韻詩見過且督再和去後急就一首
苦欲留君君又歸翻然上馬力欲飛與君未罄連夕話

復遣僮僕牽君衣問君墜卧城東宅病足幾時能着履
倉皇不肯戒前車道上泥深行豈得君時坐笑當空庭
笑予亦怯泥塗行有如醉者醉初醒戒客不遣操樽罌
當時我悔不子戒我足子肩誰重輕世間豈獨我與子
慎勿局促傷高情黃門筵中客滿座回首光陰如鳥過
宦途顛蹶亦有之不見黃門已州佐人言官重不如身
我身幸全何害墮自斷吉凶皆付天不須重問梁丘賀
聞君此語唯復阿如病得鑿逢扁陀亦知身世等夢幻

實恐名教遭譏訶孫臏則足尚酣戰幼輿折齒還高歌
何如樂正一傷足憂心抱痛如創戈君方大笑復出戶
五十漫勞啞百步試教鮑老復當場豈免狐疑更狼顧
昔聞達奚走奔馬曾說此兒還此父吾曹豈是馳驅才
自合儒官守文簿前言戲君君不知極辯為予無乃誤
今宵且作風月談莫更塵途論典仆君歸我坐時獨吟
頗覺詩成少神助知君此興正不淺卻似輕車隨熟路
歌長韻險亦有數我已三廢君兩度急須走筆償我逋

莫道詩來天已暮

得文敬雙塔寺和章招之不至四疊韻奉答

問君朝回胡不歸西馳急腳走若飛云承部檄籍戎伍
歲給纊帛頒冬衣浮圖東望瑜伽宅尺地西垣懶迴履
祇應官事了癡兒怪底可人招不得想當岸幘坐公庭
東曹號令方風行直窮妙思入權度豈有暇日消盤饗
棲遲鞅掌自有地向來笑口未可輕間官飽食太倉粟
使我刺促難為情埋頭日向書堆坐歲月都將病中過

久知筋力負驅馳我已愧子郎官佐今年墮馬復病目
目病雖輕不如墮併拋筆硯委塵埃且免墓謔兼履賀
兩旬面壁西簷阿禪心不動如祇陀門前索文如索債
遜謝不敢加嗔訶官稽私負兩不辦為君重和墮馬歌
興來作字大如掌眼暗僅辨點與戈塵多路長不出戶
繭足還思墮時步淖險真停足馬迎情深屢枉高軒顧
卧無小吏驚報衙行愛嬌兒解隨父擬借東曹度支手
記取玉堂風月簿從知身病是間時病裏不間誠大誤

嗟予病起身亦健又被君詩壓將仆我兼二病君但一
寧不少留為我助知君尚有逸駕才我馬虺隤當避路
七擒八克古有數白戰共君今幾度我歌又竟君不來
欲效魯陽揮日暮

若虛詩來欲平馬訟五疊韻答若虛并東文敬
佩之

馮郎墮馬長安歸身病在床思奮飛我時病墮忽兩月
幾度為渠驚倒衣邵郎近墮橋頭宅右足獨拳愁躡屐

三人墮馬渠最傷畢竟墮同誰失得西涯書屋東曹庭
詩筒絡繹東西行本緣詩墮不為酒玉山自倒非金罍
馮郎談虎色獨變開口不問重與輕吾宗白洲不墮馬
亦作墮語真多情喧爭浪謔兩當坐頗覺風流成罪過
向來曲直未分明旁引諸家為證佐訟當坐人不坐馬
勝負在詩寧在墮馮郎欲作旁觀人負汝何悲勝何賀
白洲老吏直不阿手持三尺無坡陀欲令虞芮成禮讓
不遣秦越相譏訶不然健訟化勅敵祇恐吳儂圍楚歌

南山一判不可改昨夜東壇聞止戈詩家紛紜各門戶

爾我不須分跬步世門夷險自有途駮駟駘駘竟誰顧
古來相馬獨孫陽有子分明不如父白洲乃欲賣我馬
卻付東鄰酒家簿人雖千慮有一失我馬雖駘亦應誤
君看三馬二馬良馮馬最良先我仆白洲有馬誇健彊
縱免墮傷為盜助詩成我有判渠歸良馬勿與駘爭路
佳辰美景亦有數莫遣閒情髣髴襟度急呼邵李招馮郎
下馬共醉西涯暮

體齋宅賞蓮席上得十字

池亭雨過芳塵浥池上花開衆賓集回風忽覺翠旂翻
倒影真疑彩雲濕越浦新粧水底明漢臯遺佩空中拾
剪裁似欲煩并刀浣染卻愁翻墨汁根非異種難同調
身在後時終獨立已當佳麗國三千不羨艷陽春九十
桂苦蘭辛祇自憐桃紅李媚何嗟及酒如戀客傳不停
花似解詩催更急坐看烟蓋晴裊裊欲采露房秋戢戢
我狂不去當重來鯨飲碧筍三萬吸

書蒙翁老先生書畫卷後

蒙翁書法天下豪坐驚風雨隨波濤有時意匠入幽眇
力與造化爭纖毫仰觀千年俯一世紛紛弄筆皆兒曹
書家論定價亦定須識我翁人品高戲將水墨灑縑素
如飫梁肉甘醯糟殘山剩水世莫覩流落數紙青蒲萄
一登翁門遂隔世齒頰未獲沾餘膏如遊神山見石髓
頃刻再往不復遭莆田鄭郎得寶藏明珠雜佩金錯刀
摩挲兩眼百過讀使我涕淚盈青袍三年留玩一朝去

久假似覺歸心勞泰山東顏日西墮欲往從之中鬱陶
詩成起立歲將暮空庭短髮風蕭騷

戲贈王古直

王郎詩窮人共知王郎書法窮於詩亦知二者關造化
學成便有窮相隨腰金拖玉自有相安用效此伎倆為
長安城中走僕僕面皮皴皴瘦且薰出門信腳自來往
酒醒不記東君誰囊無百錢有數紙碼瑙照案堆琉璃
問渠寶此亦安用寒不可絮飢可糜渠言俗士豈解此

肥肉火酒甘如飴十年遠遊得奇貨恨不歸詫婦與兒
功名事業付杯酒尚復與子爭毫釐世間巧拙各萬狀
看渠非黠還非癡揮毫贈君莫浪喜我詩不是瓊琚辭
題衍聖公所藏范堯山水圖

高山隆隆石磊磊長流奔湍轉深匯杈枒老樹生古枝
上有懸菌贅成癩凌兢石路難容車艤舟欲渡江無涯
騎驢過岡驢腳跛行客關山應苦嗟大行峒堯劍門遠
不是天台還閩苑世間平地能幾何萬里江山隘雙眼

良工此畫誰與傳北人云是范華原風多歲久縑素裂
隱隱斷墨塵埃間尼山孫子簪纓客坐愛清風灑堂壁
平生幽賞幾人同嗟我尚抱山林癖岱嶽峯高泗水深
向來瞻望空至今登高作賦非吾事不盡乾坤仰止心

徐用和侍御所藏雲山圖歌

何人醉寫雲山圖浮雲瀕洞山糝糊空明射地日漏影
稍覺林樹開扶踈平原蒼莽不知處忽有細路通榛蕪
茅堂枕山半閣水卷幔正對前峯孤幽人深居不出戶

縱有鄰舍無招呼低頭把卷苦吟諷語暗不辨楚與吳
中流棹歌似相答欲斷未斷聲鳴鳴雲多水闊望不見
知是滄洲舊釣徒長安六月晴復雨若非塵土還泥塗
城中見山如見畫剛可髣髴求形模山猶可見水莫涉
尺潦豈足容長艫十年舊遊憶南國歲月催人非故吾
鸚鵡洲前漢陽樹此景此詩今有無因君此圖意披豁
便欲買棹遊江湖

題應寧所藏馬敬瞻山水圖

空堂宿霧衣巾濕展卷看圖向庭立高峯巖從樹蒙茸
雨氣山光滿川隕中有扁舟一釣翁手把綸竿頭戴笠
欲渡真愁野水昏將歸更恐溪風急渠雖不語吾亦解
已覺良工竟先入練川老子舊名流三十年來邈誰及
今時畫工強解事枉禿霜毫翻墨汁舍人耽詩復愛畫
斷素遺縑總收拾向來卷帙堆比山後得此圖尤什襲
嗟予對此開鬱悒如熱者濯渴者汲詩成畫去兩無聊
空對西山高岌岌

觀懷素自序帖真蹟東原博太史

吾鄉上人老藏真揮毫作字精入神金書石刻世已少
况乃縑素隨風塵大江東南天萬里流落數顆驪龍珍
百尺高門若深海腰絙欲入茫無津吳公好古得奇貨
傳借數手來鄉鄰後堂開扁許坐我展卷故覺情相親
嗟予生晚見亦晚三十六年空復春蘇黃二老尚莫覩
猶喜未之前生因向來摹本已酷似昔見其影今其真
臨池對影不自陋塗抹欲效西施顰願攜紙墨就几格

亟往不避僮奴嗔餘光東壁幸不惜且復照我西家貧
請君勿返連城壁留待他時慕蘭人

賀靖逸諭德得孫

崑山良田多種玉玉子纍纍歲仍熟風流雍伯已千年
年少玉郎今姓陸陸郎二十清且溫太史之子封君孫
向來娶婦復生子頭角雖殊風骨存錦裯繡被光照面
氣如長虹眼如電清向徐卿坐上看美於潘岳車中見
一齡倏忽還再齡漸教能笑復能行已從坐客識奇物

更與名家占德星登堂賦詩賀太史人生有孫勝有子
皆言有子萬事足見子作翁胡不喜同年健者傳與陳
有孫不逮高堂親我親幸健子尚少四世如君今幾人
白頭封君年七十如麟振振螽蟄蟄會看太史得曾孫
重見高門車馬集

讀柳拱之員外嚴宗哲主事楊應寧舍人倡和
長句戲次韻一首

詩壇森嚴陞復楯白戰雄心氣難忍西鄰有客興亦酣

睥睨重圍目雙眈居然地隔如秦越或者神交同白棋
故知宮角本諧聲復恐圓方不相準向來蹇鈍費鞭策
已分駑駘謝駉北灰餘萬念偶一生腐木經秋發孤菌
諸君才力各彊健東飛俊鷗西飛隼擬隨磅礴共盤旋
弱羽真愁向空隕霜天閉門坐不出背擁寒爐曲成蚓
強呵凍墨吟小詩力困冰毫如荷盾枯腸夜渴吻亦乾
綆短併空誰為引回首不如年少時滿堂坐客誇聰敏
韓公道德日已負后山精力空應盡逢場作戲亦偶然

不覺詩成為韻窘文章同時不易得三傑古稱吳富尹
君今並是湖南英鄉邑吾猶限封畛官未免鉛槧累
戶外催逋時接軫長歌終曲誰使予歌罷獨吟還自哂

山水圖

鷺溪練色如江色幻出山青與雲白山前雜樹豈知名
雲際高樓不論尺幽泉無聲深谷窈下作寒潭浸空碧
祇應車馬隔塵氛但有扁舟繫沙側溪頭老漁何處歸
手持輕櫓背斜暉葑堂欲到恐未到日暮山雲空濕衣

西巖兩翁共巾屨應在深山更深住南溪芳草北溪花
遙指平生釣遊處山林此樂予未知蹇裳欲去將安之
請看坡老人中景只在王維畫裏詩

周原已母孺人壽詩分題得笄

憶年十五頭始笄二十嫁作梁鴻妻自從結髮事夫子
每以盥櫛隨鳴鷄晝行顧影夜照燭舉步不出閤與閨
多情愛笄恐笄墜舉案直與雙眉齊夫年七十頭總白
白髮尚可勝梳鏡郎君宦遊得歸省會以甘旨充鹽齏

鳳冠珠翟有時降筭也未可拋塵泥戲將拈取示兒道
此物見爾從孩提願翁長健姥亦健鶴形貽背牙齒鯢
更看此物作家寶歲歲分賦長生題

送傅元秀才赴舉江西

鳳凰巢穴麒麟種竒物常為世傾竦傅生才調出名家
一不為希百非冗亦知性質有天解曾憶當年角初總
早從書派得源流復向詞宗繼支統後來英俊豈易得
我已為子神飛動十年遠作東南遊腹有江山浩奔洶

試凌逸氣脫塵凡立見孤標謝荒茸翻然赴敵翰墨場
百萬人中看賈勇會將長策獻明廷誰謂一時非賈董
未論秋薦與春闈金馬玉堂堪接踵晉陽授簡辭當習
毛義登堂檄須奉有才未免為世用藥裏參苓方在籠
厭隨時輩學奔趨肯向鄉邦銜華寵古道終教德器成
今人祇解功名重臨歧欲別無所贈頗覺塵襟劇煩墮
情深義重極憐渠我語雖多未為耗

送文宗儒太僕還南寺

豐山東面瑯邪北官寺臨山枕溪側泉甘石冷花柳香
幻出春華與秋色東吳才子洋州裔清比琅玕長數尺
錦囊秀句壓騷人玉塵雄談驚坐客誰令散地容渠懶
儘有餘才供世劇十年溷跡老風塵三載高飛未云極
問君何曹似是馬丞不負君人自惜知君自抱憂國心
豈為承平倦芻樵南方一匹累數金方且按圖為驥索
州官縣吏盡日輸營下老兵曾未識書生經濟須實用
誰為吾民苦區畫聞君獻納有嘉言肯避傍人嗔越職

朝聞吏部書上考恥以徵催買資格嗟予竊祿本無能
誤向雲霄問泉石

徐春官暮山雜詠分題得蛟溪夜月

蛟溪昨夜風雨惡月光下照溪水濁老蛟照月如照鏡
卻卷蜿蜒露頭角平沙星星石鑿鑿璇宇沉沉淨如濯
雲烟變滅氛祲消祇有空明映寥廓廣寒宮殿水中開
碧海魚龍天上躍團團桂影落虛圓縱使吳剛無斧斫
鱗甲空驚漢水鯨羽毛不度銀橋鵲已看毛骨生森爽

頓覺心神向開廓山中杖屨不成眠坐待空林纖月落

題陸寬瘦竹卷

江南陸郎瘦於竹種竹城東玉河曲未論千尺勢能長

剛道兩竿軒也足恥隨桃李鬪芳腴祇共松杉伴幽獨

茅茨可奈霜雪冷韋布不受風塵辱平生幽賞底須多

愛此清風不盈掬絕勝長安酒肉徒醺花殢月空迷復

近從畫竹得篆法坐對涼陰刻寒玉終教筆硬可通神

且賞骨多能勝肉江左詩翁太瘦生

金本清太僕號太瘦生

墨竹

篆書皆絕俗莫言汝瘦不如渠好為名家繼清躅

題畫二首

霜枯古樹秋飈飈枝間老猿罷騰踏戲將長臂撲遊蜂
半似相欺半相狎岡巒高下路東西由來異類不同棲
應憐野徑穿花去不作空山抱樹啼君不見場中有菓
房有蜜共趨園林好風日丁寧慎勿采桃花留結山中
千歲實

玄猿倦向青林坐聲斷長空碧雲破林間踈網落蜘蛛

正向連蜷掌中墮絲輕臂軟如不勝欲掣未掣還騰騰
極知物性解人意應向畫圖觀世情由來異類有強弱
幸是相逢不相虐猶勝虛堂萬縷絲無數飛蟲掛簷角

畫山水

山家住在雲深處眼見雲來復雲去朝隨爽氣入空山
夕變浮嵐掛高樹蒙茸草色迷東西石路崎嶇高復低
槿花成籬竹為障中兩幽人此相向芒鞋鐵杖烏角巾
白頭雙鬢何繽紛來時似帶林霏濕坐久不知山日曛

門前落葉多仍掃故人相期苦不早杳靄疑無遠寺鐘
啞啞忽有中流櫂危橋雨過苔應滑後圃花殘人未老
若耶雲門未可登天姥匡廬夢空到乾坤浩蕩真無極
詩話一燈青未了絕勝王郎典盡時扁舟載雪山陰道

畫禽

高樓野雀低飛燕長在峯頭與溪面竹鷄啼徹雨初晴
山脚泥深路如綫崖根老樹回餘青樹間雙鵲間無聲
祇應識得山中樂無復人間送喜情

又

天風夜號山木折石上飢禽啄乾雪忍凍寒鴉得並棲
數聲啼落前溪月銀塘波冷雙鴛鴦忽憶春風蘋藻香
鵲鷓似解遊人意碧水青霄路共長

懷麓堂集卷八

欽定四庫全書會要卷一萬六千六百三十八集部

懷麓堂集卷九

明 李東陽 撰

詩稿九

七言古詩

馬博士所贈王少叅劍閣圖為少叅子公濟進
士題

岷峨山高連劍閣峽門中開如鬼鑿盤渦濺沫紛欲躍

石勢迎流鬪還卻驅車入山山路惡水行孤舟陸雙屨
古來蜀道難於天信美不及還家樂揮毫作圖圖者誰
東吳老翁生好竒曾蟠萬壑筆三峽或有神助非人為
昔從此地值竒客直以賞識酬心期江山無情歲月改
頭白再往失路歧王郎年少今已壯仰睇丹梯隔青嶂
遺縑斷墨空塵埃我已為子神悲愴酒酣作歌歌始放
我懷峻嶒聲跌宕君不見風江捲地山蹴空誰復壯遊
如兩翁

送周原已院判之南京席上得別字

金陵山水真竒絕我昔南遊遍車轍歸來夢想隔塵蹤
翼未高飛肘先掣與君有約各分署三歲兩曹惟一缺
羨君此去若登仙欲往不得心內熱如遭炎蒸坐深甑
擬踏陰厓齧寒雪君今況得故鄉歸我是北人猶愛說
停君酒盃聽我歌我歌未終君斲輟折桂橋邊衣錦行
雨花臺上登高節古聞騎鶴上揚州得未為艱失為缺
太常陳卿我同志官府神仙非濫設因君寄語須自珍

莫道玉堂天上別

題畫送武陵楊處士

洞庭湖西芳草新
武林溪南花滿津
山深水曲不知處
燕語鶯啼春復春
紅塵盡斷車馬迹
時有松風掃白石
三尺孤琴一老翁
布衣芒屨無人識
君來遠作長安遊
君去還歸溪水頭
山林鐘鼎各有分
俯仰乾坤安所求

賞花夜歸圖

江南三月花滿城
城南城北堪遊行
馬蹄衝曉踏春去

日暮歸來空復情
溪橋繫馬紆春步
綠徧蒼苔舊時路
醉眼低迷楊柳烟
春衣坐濕薔薇露
重門曲檻花陰陰
李徑桃蹊深復深
手持紅燭候歸路
應有兒童知賞心
賞心自少今已老
每憶花枝被花惱
寄與高林宿鳥知
明朝莫更催歸早

鄧程番遣愛圖

貴州有府名程番
天子命置新流官
鄧侯佩印出九寺
五馬遍歷千巔岼
諸夷異姓十七種
始識漢節瞻衣冠

喜有錫賚怒有罰頃刻號令隨毫端坐令府藏足貢賦
野少刦掠無飢寒鄧侯去郡民擁道力挽飛權迴奔瀾
舟行欲動掣不動咫尺如度百丈灘攀轅卧轍古亦有
夷夏之治孰易難誰圖彩筆遺水紉彼夷之首宋與安
侯名去比雪山重遠道未覺行囊單侯今出佐六州伯
舍舟躍馬復據鞍明年持此向齊魯應有東人為聚看

麥舟圖

江東故人半零落江頭石郎淚雙閣三喪未葬家苦貧

舉世今無魏州郭
睢陽范郎方少年
相看不語意茫然
江舟載麥五百斛
揮手付之如一錢
歸來侍立庭闈畔
白髮聞之為一莞
亦知父子本同心
若待庭趨嗟已晚
君不見慶州饑民
曾告荒使君自發
常平倉

四禽圖

樛枝老樹幽巖裏
山鷓雙棲掉長尾
高鳴俯搦勢不停
似向春風矜爪觜
山頭錦鷄金作冠
身披五采成斑斕
遠從紅日霽時見
更向碧山深處看
人言此物真絕特

同是山禽不同格休將綠水照毛衣
祇恐桃花妬顏色

又

空山雨過枇杷樹黃顆累累不知數
金衣公子正多情
驚墮金丸欲飛去海榴花殘紅子新
沙上鳧鷖來往頻
每從水淺花深處遙見隔花臨水人
山禽關關水禽語
脈脈幽期相似許莫負天晴日煖時
一春江上多風雨

又

碧林紅葉驚飛鳥江上秋風下來早
鴈去鴻辭烟水空

蒹葭落盡芙蓉老
原頭鵲鴿如有知
應憐歲暮得同棲
枝間戴勝聲不住
應憶春園初降時
山林動物各有託
野雉分明出叢薄
見說豐年少網羅
低飛不及高飛樂

又

江南山深冬日煖
湖水無澌湖水滿
幽林晚逕斷人行
落盡梅花春不管
山茶花發爭芳菲
翠翎蠟嘴相光輝
烟生錦嶼寒猶戀
雪滿銀塘夜未歸
疎林落羽紛凌亂
回首青霄各分散
溪上鴛鴦獨有情
春來冬去長為伴

狻猊圖

狻猊何來自西域黃金為睛鐵為額回頭一嘯長風生
萬騎千人杳無迹雲巖雪竇深如許冒險窮幽始能得
胡兒養得性氣馴遠向中原貢王國縣官給驛天使迎
聖主親臨賜顏色朱籠鐵鎖紅氍毹詔許深居苑城北
苑中百獸安足論虎豹聞之皆屏息先朝舊物嘗有此
白首中官說宣德祗向人間看畫圖嘉名剩有兒童識
周王有道百度正虞帝無心七旬格自古昇平樂事多

謳歌亦是詞臣職

東陳玉汝

吳杉製器五尺強
稊如胡倚長如牀
方藤細篔曲木枕
意匠頗覺吳工良
高眠穩坐兩不妨
坐非箕踞眠非僵
由來萬物各有用
一物兩用無遺長
夜來我在元龍宅
醉卧此牀呼不得
歸來展轉不成眠
夢想猶疑在牀側
吾家老父年七十
此物何由置堂室
祇應為樂勝潘輿
恨不可懷如陸橘
平生有口不慣乞
與子在情寧在物

正是黃香扇枕時高堂待此無蒸鬱

觀畫蘭有感作

時林主事俊張經
歷散相繼謫官

春風吹香出芳林叢蘭開傍西巖陰幾回欲采意不適
路轉溪迴山更深虛堂披圖對幽襟忽如攬衣度崎嶇
杏壇尼父去已遠湘江屈原空獨沉我方揮弦坐微吟
微吟未成日將晚冰霜欲來侵九畹蘭兮蘭兮竟誰管

劉道亨編修雙鷹圖

大鷹昂頭小鷹俯殺氣森森動林莽朔雲捲地塵不飛

萬里乾坤同一睹野風蕭蕭日將暮
罷獵歸來勢猶怒獨向林間振羽毛
空山落葉誰能數平原紛紛走狐兔
燕雀之輩安敢侮縱使長飢不附人
須知特立難為伍海東青去已多時
塞北赤毛生更稀郅都城在餘荒艸
劉表臺高空落暉畫師好手亦無敵
酒酣健筆疾若飛霜毫素練出髣髴
金眸玉爪生光輝翰林主人負竒骨
雖有搏擊無由施會看竦翮入霄漢
不與凡鳥爭雄雌

外舅成國朱公壽六十

金陵城闕蟠龍虎老將提兵舊開府由來家世本公卿

親得君王賜圭組錦袍玉帶明琱戈坐鎮四野無嗔訶

已看鍾阜山增重復遣長江水不波清油幕擁旌旗盛

細柳營聞笳鼓靜民歌清淨曹平陽身繫安危郭中令

江草江花春復春華堂麗景逐時新端陽節後凡幾日

壽俊圖中第一人

時南都諸公卿
有壽俊會圖詩

玉壺貯酒玻璃色紅

裊簇地麒麟織于氏門間有子孫平原庭館多賓客緇

衣武公元好賢鄂國將軍不愛錢聊將書卷度長日肯

買歌兒供暮年嗟予舊是通家子塞鴈江雲意千里願
公耆壽比岡陵永作干城鎮南紀

題畫

平川雨溢波不流兩車渡水軒若浮車輪載重軋巨牛
牛力尚可行人愁後車在水前在丘欲進卻顧且復休
山途野店阻且修日云暮矣不得留胡兒健馬雙絡頭
肩載糗索無戈矛得非遺寇居邊州或者俘獲隨官郵
窮廬不作風雪囚道路雖險無離憂聖朝有道鋒鏑收

胡我赤子非仇讐誰哉更起籌邊樓

又

風林不定驚枝裊上有修翎兩山鳥溪邊獨鶯短絲垂
影落晴波秋森森鴛鴦鷓鴣似爭春錦毛繡翼相鮮新
寒鳥數點寂相背頗學山翁避貴人山鷄兩翼花如剪
未勝鸞群嬌宛轉曲水亭前路有無黃陵廟下湖深淺
窮崖老樹猿倒懸彼何色者白與玄山中麝子未生角
錯立不知誰後前世間飛走各有性詩人自古歌魚鳶

莫將藻繪作物假此物自是無聲篇

觀泉圖

空山落葉無人管長林蒼蒼秋日短飛泉百尺墮空濛
下注寒潭作清淺淅瀝如聞帶雨來飄搖忽被風吹斷
憶向山中初聽時乍近卻疑身在遠幽尋僻探始得之
毛髮蕭騷不容縮鸚鵡江洲竟趯翻匡廬瀑布誰分剪
世間竒勝自有地應恨入山來已晚十年雙袂京塵滿
亦欲相從為一浣安得圖中二老翁芒屨竹杖長為伴

東山圖

謝公昔卧東山麓山中無日無絲竹美人笑捧如花顏
飲酒賦詩歡不足古來同樂必同憂公能不為蒼生謀
征西司馬亦何事猶使桓兵窺上流賊兵在郊公在壑
天下江山個中睹老温病死強秦奔一代功名荷天與
太平宰相固云云清言非罪還非勲四郊多壘一身樂
吾憶冶城王右軍

朱元章拜石圖

南州恠石如竒士士有好奇心欲醉平生兩膝不識地
石也受之無色愧着袍擁笏當石前禮而不答貌益虔
呼為石丈丈不語回視諸峯盡兒女當時觀者笑且嗔
眼中見石不見人嗟君好潔已成癖無乃冠屨沾泥塵
古來玩物必喪志况爾物役忘其身惟石巖巖瞻赫赫
一州雖小寧無民宋家只合米博士誰遣出刺無為軍
君不見漢家留侯拜黃石石亦可拜不可昵千載英風
石並高猶憐誤落神仙迹

謝謝方石石鎮紙

風簷細楷飄如葉惱亂閒愁千萬疊試將觚石置我前
坐鎮囂浮成妥帖誰其贈者方石翁瘦骨與石將無同
石形可碎理不曲此語吾傳東海東向來遺我枰棋製
規石為圓豈翁意亦知此石如此心不謂心同肯予致
我家嬌兒不解事徑往取之如劇戲僅辭塗抹向詩書
豈有規模守文字古來問學須磋磨要令平直無偏頗
觚哉觚哉久不見摸稜之輩何其多願兒寶石終比德

慎勿委棄墻東阿還持此石問汝伯別有矩矱當如何
張東白惠椰壺走筆代簡

嶺南椰實高千樹大者如瓢小如江良工斲剔成形模
外實中空寡疵窟青金為飾堅且良磨礪圭角藏精光
誰言曲直異從草二物相成豈相克青黃竟作犧尊災
汙抔古矣非時哉有容恥與升合校無垢頻經洗滌來
翰林人物西江老退食開壺日傾倒攜之贈我不自惜
人好更看烏亦好我雖強飲不滿鍾愁城百尺難為攻

先隨俎簋作時薦後許盤筵為客供覆盃斷飲亦未易
獨有夜戒無終窮

悼鸚鵡一首東閩元德吉士

翠籠高結層軒舉中有珍禽解人語顧影頻迴席上燈
梳翎卻避簷前雨左旋右轉百態足忽見昂藏為偃偻
聲名價重出比鄰婉孌情多向兒女耳娛目翫能幾時
珠沈綵碎隨塵泥玉環不繫芳魂住繡閣猶疑曉夢遲
應憐握粟不自飽吻渴腸空誰得知虛令賓客生顧盼

頓覺楹障無光輝憶昔攜來隴山客萬壑千巖幾朝夕
都將無色慰多愁轉使歡聲成太息因思異物難豢養
頗似竒才遭挫抑君不見鹽車千里駒長飢至死無人
惜

悼竹

園南舊植千竿綠高者如墻大如屋風狂雨急墻屋翻
榦折叢低共傾覆忽驚舞罷鴻門會怒斗紛紛碎蒼玉
復似驪山墜石餘數百書生葬阮谷初疑鳳羽墮當空

更訝擗龍身在陸翠落瓊飛不復完顏使泥沙汙人目
憶昔新移近水隈瘦骨稜增不盈束晨澆恐被風日燥
晚護幸免霜雪酷十年長養成亦艱一旦摧頽勢何速
我時夜半驚水至崛起蒼黃問僮僕彼駭不識人意勞
祇顧囊衣與甌粟觀裏桃花何足論堂前柟樹猶堪錄
無家更欲買山林有徑誰當伴松菊前軒好竹只數箇
頗覺幽懷者未足春來擬欲探萌芽蒼苔慎勿迷雙躅

重修黃樓歌

黃河水落黃樓起彭城城東土勝水彭城郡守告成功
蛟龍失勢蒼生喜朝來暮去亦偶然不似元光歌瓠子
酒酣樂作賦者誰共說彭城好兄弟卻從憂患著聲績
千載信之為賦史近聞河伯漸失職直下彭城更東指
縣官水卒徒自勞宵衣南顧星輶駛是時劉守當郡寄
仰視茲樓半傾圮當庭一叱百吏隨木石排空屹山峙
東垣土色象中央克制生存或其理軒窓開敞天日霽
百里江山皆席几清朝燕賀多辭客誰復賦之如轍比

徐山高高徐水下萬古乾坤奠周砥何年駐節許重遊
還為山靈豁雙眸

借榴一首贈方石

桃溪老人愛花樹家在萬花溪上位白頭重入紫薇垣
官舍今無種花處買花不識城市迷園中看花非我徒
畫圖剪綵盡成幻空有愛花猶故吾吾家海榴四五株
意欲借之如借書自言花借不在好僅取數尺青扶踈
牆根老枝不盈掬欲借真慙少粧束風披雨浥漸成陰

縱遣無花看亦足城西官陌無塵埃呼童把送休遲徊
花根歲暮幸勿返還我詩逋十韻來

題黃子敬編修所藏登瀛圖

編修黃子敬家藏瀛洲圖吾外舅蒙翁三跋在
焉益子敬之先公為翁同年進士而翁又其郡
大夫也予刻類博稿舊草中得二跋歎遺文不
可盡見悲歌當哭於此有不得已云

晉陽城上龍乘雲日角照地成龍文大開文館集賢俊

幕府諸僚才出群層樓傑閣麗霄漢左圖右史窮朝曛
瀛洲萬里入平步俯視人世皆塵氛龍飛上天御八極
十有八人為羽翼廟堂台鼎何足論半是凌烟畫中客
晉陽一家家化國回視門庭為國敵盡將文學變戎功
誰辨河汾太平策紛紛世上功名徒至今摹畫瀛洲圖
衣冠猶存歲月改粉墨散落隨江湖翰林黃即家住莆
莆翁史筆今董狐由來詞翰類博奕人道我翁多相謨
願君寶此為故事黃閣清風無世無

劉戶部所藏張汝弼草書

南安太守東海翁歸來兩袖乘天風眼前萬事不挂齒
睥睨六合稱書雄橫揮直掃百態出或舞鸞鳳騰蛟龍
一從篆隸變行草世間此藝難為工自言早學宋昌裔
晚向懷素逃形蹤公孫大娘不識字物藝乃與書法通
顏家屋漏古釵腳縱使異法將無同古人逝矣不復見
此翁豈在今人中江南紙價幾翔踊白金綵幣隨青銅
家藏萬紙付兒輩誰謂此翁歸橐空何人愛者司徒公

舊得此卷來吳淞願公寶此勿輕棄留看書舡夜半虹
送李惟正主事使淮

淮山蒼蒼入烟樹中有東曹舊分署郎官捧檄下層霄
疋馬暫從沙上駐漕舟百萬如屯雲材官武士紛成羣
榜歌調苦隔溪聽籌唱聲高半夜聞向來書簿何膠擾
卻道郎官愛文藻燭底寒更夢短長筆端餘興詩多少
古來王事貴驅馳壯夫豈必雕蟲為休言玉郎衝星夜
不及瓊林宴月時

左闕雪後行古柏下有作

長安城中雨成雪退食衝寒過東闕蒼然古柏勢橫空
數尺盤拏成百折玉龍戰罷纏碧綃流涎噴沫凝不飄
仙人掌上露初凍五老峯頭冰未消飛花拂面吹還轉
步屨穿林印猶淺鶴氅衣輕動欲翻水精簾重寒初捲
風骨昂藏屢出塵儼如佩玉拖長紳須知世有後凋質
元是仙家不老身

畫馬歌

唐家內廐多飛龍五花隊簇金芙蓉奚官引鞵供飼秣
退朝牽過明光宮絲繩百丈鎖長柱宛轉霧鬣隨風髮
銀床玉餅汲宮井俯首下飲如渴虹氣噴為雲血成汗
意象矯矯騰高空當時監牧最得寵襁褓小兒皆錄功
丹青畫史極摹狀尚以骨肉分雌雄空將盛事作粉飾
萬騎不到三川東千年粉墨出舊譜乍可髣髴開元中
今皇有道華夷通歛武不耀兵戈鋒祇應神駿飽芻菽
長在天閑十二重

送仲維馨院使還淮南

雙環雜佩搖丁東少年通籍明光宮每逢天子賜顏色
長與大夫歌退公舊懸腰帶黃金重新送官壺白露濃
人道相如歸畫錦誰言張翰憶秋風秋風未動江花老
忽向東原賦春草千金寧為買書貧萬事不及還家早
巢中健翮長雙成鏡裏慈顏看轉好况當朝省盛才賢
且向山林樂熙皞淮南江北湖水傍門前綽楔高如堂
舊書舊隱故無恙某水某丘安可忘采將芹葉思君獻

所得江魚念母嘗我亦臨風惜分手碧雲高處望回翔

苦熱行

辛亥六月十七日

炎天火熾金初伏赤日南行到南陸誰將素簫鼓洪爐
煇氣長噓滿川谷高雲當空屹不動大者如山小如屋
渴虹下飲溪無言野堆成蛟入藏麓重波煮海石欲爛
鬼斧赭樹山應禿玉堂去天纔一蹴不見剛風起鴻鵠
人間路躅騏驎愁萬蚋千室競喧逐極知寥廓是仙遊
始信祝融真吏酷我時擲筆出史局十步天墀九回躅

暫辭書簿日紛紛豈免冠屨相縛束騎行扇擁且莫當
道有頽肩隨赤足歸來岸幘高林下旋汲清泉漱寒玉
煩心展轉不得眠中夜起坐呼僮僕安得大瓢小一掬
頓洗歎塵三萬斛

題清明上河圖

上有先
提舉跋

宋家汴都全盛時四方玉帛梯航隨清明上河俗所尚
傾城士女攜童兒城中萬屋暈薨起百貨千商集成蟻
花棚柳市圍春風霧閣雲牕絮朝綺芳原細草飛輕塵

馳者若飈行若雲虹橋影落浪花裏振舵撒篷俱有神
笙歌在樓遊在野亦有驅牛種田者眼中苦樂各有情
縱使丹青未堪寫翰林畫史張擇端研朱吮墨鏤心肝
細窮毫髮夥千萬直與造化爭雕鐫圖成進入緝熙殿
御筆題籤標卷面天津一夜杜鵑啼倏忽春光幾回變
朔風捲地天雨沙此圖此景復誰家家藏私印屢易主
贏得風流後代誇姓名不入宣和譜翰墨流傳藉吾祖
獨從憂樂感興衰空吊環州一杯土豐亨豫大紛彼徒

當時誰進流民圖
乾坤顛仰意不極
世事榮枯無代無
漕運叅將郭彥和
鎮蘇松時有巨舟
張東海名曰海天
一碧為賦長句

將軍昔鎮東南紀
獨駕樓船向江水
天光蕩漾海微茫
一碧乾坤萬里畫
椽繡閣高如堂
朱簾綠浪相悠揚
魚蝦不動蛟龍喜
笳鼓無聲歌吹長
杜甫恍如天上坐
坡老休夸海中過
雲影真疑錦繡開
汰痕莫擊琉璃破
巨鰲戴山空崔嵬
陽侯撼地無喧豗
凌風不作蘇門嘯

泛斗還從漢使回君不見清淮上與黃河接中有漕舟
千萬葉將軍亟去來勿遲聖朝正值河清時

三壽圖歌

監察御史祁門謝廷獻得南極圖寓歸為父封
君壽請為長句時其伯叔父皆在焉

何人妙作南極圖極星晃耀當南弧化為老人長骨顱
翩然凌空一鶴孤剗風為舉雲為扶俯視六合皆泥塗
下有二翁儀貌都仰天翹首若有呼仙凡異路心則字

頗覺殊相非庸夫茫茫塵海難乘桴誰更有人如此夫
新安謝氏黃綺徒伯年七十顏不枯繡袍白簡高帽烏
如星有芒鶴有雛封章帝降來江湖李也與君同範模
布衣韋帶相蕭疎稟形鍾氣非二初情深不間爾與吾
此圖此景世豈無持以鬢鬢猶其粗郎君得此踰瑤珞
身立玉階入金鋪南飛一曲酒滿酌恨不舉翼如輕鳧
當筵索筆徵詩逋魯歌三壽理不誣五星作贊後有蘇
吾才不能奈此乎

題夏仲昭墨竹橫卷蓋陳緝熙先生故物也

崑山夏老能筆耕開雲種玉看靖嶸千條萬葉入霄漢
世間草木空有名來持琅玕叫閭闔坐使燕石無光晶
北人貴竹如貴玉直以高價酬丹青衡開大幅直踰咫
不見枝梢見根柢恍疑湘浦推蓬行颼雨驚飈過雙耳
九疑山南望不極影落洞庭清徹底靈籟時來天樂風
釣竿不動珊瑚水珊瑚水冷魚龍藏此翁一去竟茫茫
江山有神故物在環珮無聲涼夜長東吳老子圖書散

南國諸生思未忘
重向玉堂修竹譜
須將偃竹記篋簞
送張侍郎文淵區處哈密

文皇御極開西裔
坐使諸胡作藩蔽
哈密王封最長雄
錦袍金印華文字
百年職貢輸玉馬
所貴在誠非物貴
有番土魯誇狡強
讐深怨結鑄肝腸
攻城奪印虜王母
憤叱胡走如驅羊
叩關訴吏急水火
羽書夜報驚朝堂
先皇赫怒將效力
降勅切責昭刑章
漸收殘胡住甘肅
官為造屋頒衣糧
部酋罕慎秩分閭
薪亦可卧膽可嘗

旁邀八衛合萬騎復仇雪恥還封疆孤居城角自偵邏
兵力雖弱志足傷番來結盟駐城下罕慎下城如下馬
當時料敵無柳渾又見孤身橫草野十年辛苦一朝失
頓覺雄豪氣喑啞諸人瑣瑣安足論身是中朝拜官者
今皇馭世九宇清彼番悔禍來輸誠歸城納印貢異物
氛翳歛退回光晶聖朝有道繼絕世復以故爵稱嘉名
胡兒習貪再挑釁掠取萬馬歸空城城危兵歛衛不守
逆順翻覆相虧盈皇威載奮若雷電勅遣兵卿下前殿

輕裘緩帶隨肩輿不用金鑿擁銅面籌策胸中兵甲生
指麾坐上風雲變不愁跋涉經秦隴幾慣馳驅歷周甸
直省辭家世所難臨歧解整人皆羨甘州城外河周遭
玉門關上冰山高營平圖畧本常事定遠功名非彼曹
空庭搗穴豈不易可忍赤子塗脂膏閉關却使法亦有
重念王業經營勞根盤節錯氣亦利古來經濟須人豪
君行萬里慎自愛莫待春風吹戰袍

題畫

誰家結屋臨山水水閣山亭兩相峙卷簾嵐氣撲衣來
側耳松聲半空起迴巖掩樹無東西墮溜平田高復低
溪魚直下不受餌林鳥驚飛還暫棲幽人只愛山中好
有腳不踏長安道懶為花開數出遊猶嫌葉落頻教掃
城中赤日飛黃塵此景此圖空可人朝來一雨差快意
欲駕扁舟江上津

學士栢

翰林後堂有二栢竹巖柯先生所種也東陽承

詔受業今三十年栢已鬱然而先生棄諸生久
矣間出題課諸吉士弋陽汪俊抑之有一日百
匝行樹底之句悵然感之因行為一篇以識不
忘

我行樹陰日千匝雨葉風枝自蕭颯惟有諸生識我情
傍人不解空嘲狎我見先生種樹年我身尚短樹及肩
枝蟠江山地可縮手幹造化天無權瓊臺翠閣何森爽
院柳庭花敢爭長芘蔭長留六月陰盤迴直與孤雲上

材堪五鳳難為用，根到九泉終不枉。零落青袍幾故人，
琮琤玉佩空遺響。當時院長文安公，柯亭劉井相西東。
百年遺愛豈獨此，此樹欲比人中龍。樹猶如此我何似，
已愧斑白非兒童。名收棗桶有先後，壽比金石無終窮。
下堂再拜想顏色，仰面正拂長髯風。

竹林七賢圖

中原勝地衣冠藪，魏晉風流動人口。竹林有客稱七賢，
千古閒情一杯酒。應從晚歲看冰雪，不向京塵醉花柳。

霜枝入鬢助蕭騷風籟鳴絃和清瀏官曹懶入步兵厨
琴調誰傳廣陵手隄防不為此曹設極目頽波正東走
魏國江山晉版圖林泉舊跡空回首山公雅論終無用
餘子紛紛竟安咎新亭灑淚復何人將相徒懸印如斗
丹青點染半形似遺像猶煩辨誰某長歌吊古意茫然
九原有作君知否

雪用坡翁聚星堂禁體韻

塵沙壓盡園無葉一月長安三見雪登高望遠極空明

天上人間兩竒絕吟髭欲撚冰先斷凍指未動絃應折
輕憐衣袂逐風揚淺訝屐痕隨步滅西岡徑滑猱難度
北海波寒鰲未掣真疑地骨高比山始信天機織成纈
寧將巧技爭圖畫且勝高談霏鋸屑候前忽後同積薪
乍有還無不同瞥神遊隔世虛勞想妙入忘言誰解說
歲寒交誼轉寥寥獨有庭松如屈鐵

釣魚圖為葉司徒公題

兩舟同行如結鄰兩翁相對各垂綸絲長水遠意不極

俱是江湖閒散身，倏無忽有時。交詫咫尺烟波，不相借
稚子牽絲似有情。前村問酒先論價，江淮以南冒暑多。
瀟湘向上皆風波。公家正住魚龍窟，我興卻在滄浪歌。
滄浪歌長，秋日短，野水寒。天迷近遠，酒醒高堂，看畫圖。
黃蘆瑟瑟江風滿。

牡丹孔雀圖為瓊山岑生作

海南風日暄，且妍牡丹花。開如火，然花間孔雀雙旖旎。
似與植物相矜憐，竒毛晝炫日五色。下照清潭影，千尺

棲息應勞擇地心盤旋似惜冲霄力江花澗艸秋復春
風翎露翼空繽紛已看翡翠讓光彩復道鷄居非我羣
眼中世態爭好醜此物於人故非偶衣錦先憑戲綵身
射屏正得穿雲手比人見畫復憐才此花此鳥何竒哉
上林剩有梧桐樹拭目看隨紫鳳來

送平江伯陳公總督修河兼東劉都憲時雍

黃河西來復東決張秋舊堤先受齧奔波赴海勢不停
百里漕渠一時泄官舡賈舶如山墜河底沙乾日欲裂

九重南顧回舜瞳三命中朝持漢節陳公舊是恭襄孫
奕代簪纓萬人傑爭誇將種非凡材復道家傳有真訣
兵符夜檄鯨鯢走將令晝驅雷電掣指揮能事天地回
坐計功成同解結時方六月霖雨多地苦沮况炎熱
民窮到骨聲徹空忍使鞭笞汗成血極知國計須元氣
乍可因時治癥瘡比聞水發舟已通暫遣丁歸待農輟
三犀永作洪濤鎮一蟻不潰金隄穴古來大事當遠圖
豈論竹頭兼木屑慣從前史鑑興衰已聽高談能激切

湖南中丞久奉使頗覺憂勞成耄耋因公寄謝平生交
自愧官曹容逸拙

四禽圖

鸚鵡色不如鸚鵡強向筵前學人語網羅西下隴山空
毛羽雖佳不如汝鐵衣金背雙雕楹世間無處無弓繒
試聽內苑籠中語空誦彌陀六字名

又

珊瑚出海海見底誰掣長竿臨海水黑風驅霧卷冥濛

化作禽飛向空起北人未熟南禽名嶺外方言如鳥聲
由來珍異非國寶須識君王卻貢情

又

金堤柳色黃於酒枝上黃鸝嬌勝柳歌聲宛轉色娉婷
種種春光無不有春來何遲去何速回首紅顏憶騎竹
急須携酒聽黃鸝莫待楊花眯人目

又

春山潑黛青淋漓山際春禽雙畫眉山光物色兩濃淡

若欲問春春不知古來尤物皆成恠誰遣山禽入圖畫
西京京兆今不歸林郎為了風流債

題魚

安成劉郎家畫魚意遣素練澄江如長安屏障半不虛
誰其好者彭中書手提鉅軸尋丈踰低撐側挂妨我廬
風軒露坐方卷舒赤鯉忽躍來庭隅揚鬚奮鬣當天衢
波濤脫盡勢欲孤獨立似有神明扶桃花浪暖三月餘
只尺變化還須臾雷車晝擊電夜驅前騶後從何紛拏

魴鯁擁衛鱣鮪趨左引鯊鯨右鯁鱸回頭下顧若有呼
瑣瑣之輩真臺奴水有菱荇岸有蒲倏忽隱現如有無
馮夷海若空睢盱翻若糞瓠遭泥塗昔當洪流在唐虞
微禹赤子其魚乎達人宏觀無古初清濁莫位分堪與
天飛淵躍理不誣彼潑潑者如斯夫文江不與龍門俱
其上或有銀潢瀦鍾靈毓秀信有諸中書令祖風骨殊
鰲頭望重冠蓬壺散作霖雨蘇焦枯鯨飛天上遊帝都
瞬息歲月同朝晡鱗宗介族多簪裾中書亦是瀛洲居

炯如驪龍生掌珠如麟有角鳳有雛共為周瑞環郊郭
予生少作龍門徒臨風感事重鬱紆此祖此孫情所於
翩然對此興欲徂豈謂城闕非江湖碧海思掣青珊瑚
揮毫對客非故吾魚乎魚乎嗟此圖

題鴈送鄧宗周憲副

黃蘆簌簌鳴秋雨北鴈南征度江渚羣分旅逐各有情
側睨回看似相語咏者自咏飛者飛忽然長叫入斜暉
片時殘夢斷還續千里關山歸未歸誰令歲序多反覆

轉使道途成骨肉水有菰蓴原有粟猶勝鷓鴣一枝足
我家舊在湘江東十年祇住京塵中送君無限思鄉意
昨夜南樓聞朔風

送徐復齋還宜興

徐翁來自江東南烏紗白髮風毵毵登堂拜兄執弟禮
滿坐和氣回春酣兄酬弟勸雜鄉話吾輩之樂樂且懣
吾宗老稚數百指或有困積無儲甌杜陵破屋隨長鏡
萬間廣廈猶空談范家義田久不置比郡尚覺仁風覃

少年慕古老亦諳况有祿俸餘溫甘兄才廟堂足經濟
弟力自與田園堪分田命僕課耕獲笑指庾廩高巉巉
留餐豈止樹間飯解贈不待囊中探坐令骨肉異塗路
饑者有食寒者襁遺澤猶應溉枯涸清風斷可驅頑貪
弟為遺叟居江潭兄為元老我冠簪始知吏隱各有樂
俯仰不愧三才參翁年未衰筋力健水可方牒陸可駢
明當報成向兄賀大笑共吸鯨杯三

懷麓堂集卷九



總校官庶吉士臣張能照

檢對官檢討臣龔大萬

騰錄監生臣李士勳